



Акафист
святому преподобному
Макарию Римлянину,
Новоградскому чудотворцу

Кондак 1

Избранный и дивный подражателю пророков Илии и Крестителя, пустынным житием им поревновавший и совершенно Богу угодивый, преподобне отче Макарие. Песньми восхваляем тя с любовью, святаго заступника нашего. Ты же, яко имеяй дерзновение ко Господу, молися непрестанно о спасении нас грешных, и от всяких бед свободдай зовущих ти:

Радуйся, Макарие, великий пустынножителю.

Икос 1

Ангелом любезную чистоту юности твоя возлюбив, преподобне отче Макарие, Ветхий Рим отечество твое оставил еси, и во страну Российскую яко нищ и странен пришел еси, да zde обрящещи пристанище благоприятное ко

спасению. Темже славим тя, яко истиннаго последователя Христова, и зовем ти хвалебно:

Радуйся, Рима доброе прозябение.

Радуйся, Новаграда духовное украшение.

Радуйся, Евангелиа Христова верный послушателю.

Радуйся, заповедей Иисусовых ревностный исполнителю.

Радуйся, Единого Христа от всея души твоея возлюбивый.

Радуйся, стезею правою вослед Его ходивый.

Радуйся, постом умертвивый в себе душетленные страсти.

Радуйся, молитвами усердными отразивый вся искушения диавольская.

Радуйся, возшедый на высоту совершенства духовнаго.

Радуйся, приникий во глубину смирения святаго.

Радуйся, слез твоих теченьми плодоносивый пустыню неплодную.

Радуйся, из глубины въздыханьми привлекий на ню Божию благодать.

Радуйся, Макарие, великий пустынножителю.

Кондак 2

Видев Всевидец Господь благое души твоея изволение, отче Макарие, еже служити и благоугождати Ему в безмолвии пустынем, указа тебе пустыню бластную и непроходимую в пределах Великаго Новаграда, да вселишися тамо, един Единому Богу работати в пениих, бдениих и пощениих. Ты же пустыню, от Бога тебе указанную, обрет, вселился еси в ней, яко в рай сладости зовый: Аллилуиа.

Икос 2

Разумев место, от Бога тебе указанное к совершению тамо подвигов пустынных, и возлюбив е, отче Макарие, со слезами теплыми Богу молился еси, да сподобит тя скончати на нем житие твое земное, и псаломски взывал еси: «Се покой мой, zde вселюся во век». Мы же воспоминающе таковое твое благое изволение, вопием ти сице:

Радуйся, безмолвия любителю, пустыню подвиги твоими освятивый.

Радуйся, жестокое пустынное житие проходивый.

Радуйся, псалмопении немолчными Бога славивый.

Радуйся, молитвы непрестанныя Господеви возносивый.

Радуйся, постниче не изнемогая, былием пустынным питавайся.

Радуйся, трудолюбче нелицемерный, праздность возненавидевый.

Радуйся, худыя и многошвенныя ризы носивый.

Радуйся, вериги железныя Христа ради на ся возложивый.

Радуйся, коленопреклонения многая совершавый.

Радуйся, в терпении и смирении преуспеявый.

Радуйся, слезами молитвенными орошенный.

Радуйся, равноангелен на земли бывый.

Радуйся, Макарие, великий пустынножителю.

Кондак 3

Силою Божиею укрепляемь, Макарие преподобне, великия подвиги и труды

пустынный благодушно проходил еси, и вся страхования и искушения диавольская молитвою усердною отразил еси, знамение креста Христова враги невидимыя прогоняя и побеждая, во еже не можаши им приблизитися к тебе, егда пел еси Богу хвалебную песнь: Аллилуиа.

Икос 3

Имея помысл чист и непорочну душу, отче Макарие, в пустынном безмолвии видений небесных сподобился еси, и ангелов собеседник был еси, иже утешении благодатными услаждаху тебе скорби пустыннаго пребывания. Сего ради слышиши от нас благохваления таковая:

Радуйся, рабе Господень благий и верный.

Радуйся, молитвенниче благоприятный и многослезный.

Радуйся, ангельскаго посещения удостоенный.

Радуйся, на земли небесная созерцавый.

Радуйся, учителю благочестия.

Радуйся, наставниче богомудрия.

Радуйся, древо благосеннолиственное, в пустыни возрастшее.

Радуйся, плоды сладкия Христу принесый.

Радуйся, пустыню у плодоносивый.

Радуйся, пустынное озлобление мужески терпевый.

Радуйся, путем тесным шествовавый.

Радуйся, пространство Царствия Божия обретый.

Радуйся, Макарие, великий пустынножителю.

Кондак 4

Бурю многомятежную житейскаго моря безбедно прешел еси, преподобне отче Макарие, и во пристанище безстрастия достигл еси, направляемъ заповедьми Христа Бога, яже быша светильник ногама твоима и свет стезям твоим. Темже на земли достойно и праведно воспевал еси Триединому Богу: Аллилуиа.

Икос 4

Слышавше глаголы твоя богодухновенныя, ловцы зверей дивиих, обретшии кущу твою в пустыни, отче Макарие, ангела паче, неже человека, мняху тя быти, и радовахуся зело,

сподобльшеся твое благословение и молитвы
получити. Ты же хлеб твой сухой с ними
разделил еси, и путь им правый указав, слышал
еси от них благодарственные глаголы сицевыя:

Радуйся, правило веры истинныя.

Радуйся, образе кротости духовныя.

Радуйся, человеце Божий, преподобием
украшенный.

Радуйся, воине Христов, враги невидимыя
победивый.

Радуйся, мира дольняго мудрый странниче.

Радуйся, пустыннолюбивый Господень
избранниче.

Радуйся, великих пустынножителей верный
подражателю.

Радуйся, древних богоносных отец
ревностный последователю.

Радуйся, пустыню непроходимую в жилище
себе избравый.

Радуйся, дебрь блатную славословии
Божиими огласивый.

Радуйся, богопросвещенный подвижниче.

Радуйся, ангелонравный человеце.

Радуйся, Макарие, великий пустынножителю.

Кондак 5

Боготечное светило быв, отче Макарие, к солнцу правды Христу приводил еси человеки, приходившыя к тебе в пустыню послушати от тебе глаголы жизни вечныя. Ибо дадеся тебе от Господа благодать поучения духовнаго, и бысть язык твой яко трость книжника скорописца, начертаваяя на сердцах человеческих спасительныя заповеди Христа Бога, Емуже умиленно пел еси: Аллилуиа.

Икос 5

Видев люди, приходившыя к тебе в пустыню, отче Макарие, церковь тамо во имя Пресвятыя Богородицы, честнаго и славнаго Ея Успения, соорудил еси. И обитель иноческую устроил еси, таже священства благодать восприем, игумен тоя обители был еси, приводяй братию твою пустынную ко спасению. О сем тя хвалим и зовем:

Радуйся, непорочный олтаря Господня служителю.

Радуйся, Таинств Божественных достойный совершителю.

Радуйся, преподобнии руке твои со дерзновением горе воздеявый.

Радуйся, молитвы благоумиленныя у престола Божия приносивый.

Радуйся, пастырю добрый собраннаго тобою стада пустынных овец.

Радуйся, неусыпный делателю винограда Христова.

Радуйся, сотворивый и научивый, и того ради велий нареченный во Царствии Небеснем.

Радуйся, отечески возлюбивый всю о Христе братию твою.

Радуйся, учивый благовременно чада твоя духовная богоугождению истинному.

Радуйся, бывый образе преподобия твоим учеником.

Радуйся, имя Господа Иисуса во устех и в сердце твоём непрестанно имевый.

Радуйся, скорби и лишения пустынные радостно терпевый.

Радуйся, Макарие, великий пустынножителю.

Кондак 6

Проповедник был еси евангельскаго учения братии твоей, преподобне отче Макарие, и чада твоя духовная верно руководил еси к Царствию Небесному, идеже есть жилище всех спасенных милосердием Христа Бога, пришедшаго в мир спасти падшее человечество и давшего людям во спасение Своя божественныя заповеди, имже последовав, соделался еси истинный Его угодник, немолчно воспевая Ему песнь хвалы и благодарения: Аллилуиа.

Икос 6

Возсиял еси в пустыни светом благоразумия, отче Макарие, и дебрь блатную и неудобопроходимую во училище благочестия претворил еси богомудрыми твоими словесы, имиже приходившыя к тебе верно наставлял еси на стезю богоугождения и спасения. Тебе убо, святому учителю небесныя истины, благодарно зовем:

Радуйся, Евангелиа Христова немолчный проповедниче.

Радуйся, апостольских преданий ревностный хранителю.

Радуйся, верою правою и делы благими Богу угодивый.

Радуйся, вослед тебе и чада твоя духовная к Нему приведи.

Радуйся, не сокрывый таланта, тебе врученнаго Домовладыкою.

Радуйся, куплю многу им сотворивый, спасение душ человеческих.

Радуйся, пустыню облагоухавый сладким благоуханием Христовым.

Радуйся, в ней насадивый духовныя цветы добродетелей.

Радуйся, яко твоими ученьми грешнии к Богу в покаянии обратишася.

Радуйся, яко твоими наставленьми заблудшии правый путь спасения обретоша.

Радуйся, ближних твоих искренно возлюбивый.

Радуйся, спасению их душевному усердно послуживый.

Радуйся, Макарие, великий пустынножителю.

Кондак 7

Хотение имел еси, преподобне отче Макарие, еже Богу благоугождати и спасению душевному ближних твоих благочестно служити. Темже всех приходивших к тебе принимал еси с любовию, и яко кормчий добрый, утомленные треволением житейскаго моря приводил еси в тихое пристанище пустыннаго иноческаго жития, поучая их сердцем и усты немолчно возглашати Богу: Аллилуиа.

Икос 7

Новаго тя Макариа Великаго, наставника душеспасительнаго, яви Христос во стране Российстей, преподобне отче, и дивными дары Божия благодати обогати тебе, душевныя ради твоя чистоты и многия святости: дадесе бо ти свыше благодать чудотворения и прозорливства, и был еси пророк и врач безмездный людем, иже научишася звати тебе:

Радуйся, крине пустыннаго прозябения.

Радуйся, маслино Божия благословения.

Радуйся, пустыню духовно плодоносивый.

Радуйся, обитель иноческую в ней возградивый.

Радуйся, чада послушания и смирения в ней
населивый.

Радуйся, отец истинный учеником твоим
бывый.

Радуйся, болящия молитвою твоею
исцеливый.

Радуйся, скорбящия словесы твоими
богомудрыми утешивый.

Радуйся, будущая яко настоящая созерцавый.

Радуйся, помышления человеческая
прозревавый.

Радуйся, древним пророком равночестный.

Радуйся, даров Святаго Духа
преисполненный.

Радуйся, Макарие, великий пустынножителю.

Кондак 8

Странник и пришлец был еси во стране
Российстей, преподобне отче Макарие,
непрестанно взыскуяй Отечества Горняго,
Иерусалима Небеснаго. Темже всякое попечение
о земнем стяжании отложил еси, и в крайней
нищете жизнь твою провождал еси, да
обогатишия нетленным златом от праведнаго

Мздовоздателя Христа Бога, Емуже присно пел еси: Аллилуиа.

Икос 8

Весь в Бозе быв, преподобне отче Макарие, во глубочайшую пустыню от обители твоя удалился еси, и на острове посреде блата кущу себе поставив, в безмолвии совершеннем молитвами непрестанными с Богом беседовал еси, мщиц угрызение и пустынное озлобление мужественно терпя. Поминающе убо таковое твое терпение и злострадание, яко мучеников сострадальца чествуем тя звании сими:

Радуйся, безстрастие совершенное стяжавый.

Радуйся, безмолвия ненарушимаго возжелевый.

Радуйся, молитвы непрестанныя возлюбивый.

Радуйся, образ злострадания и долготерпения себе явивый.

Радуйся, тело твое мщиц угрызением уязвивый.

Радуйся, нищелюбец крайний бывый.

Радуйся, блаженство нищих духом унаследивый.

Радуйся, о едином на потребу всегда помышлявый.

Радуйся, на земли небесно поживый.

Радуйся, во плоти безплотным поревновавый.

Радуйся, мучеников сострадальче.

Радуйся, преподобных красото.

Радуйся, Макарие, великий пустынножителю.

Кондак 9

Всем приходившим к тебе в пустыню, преподобне отче Макарие, бысть дивно видети тя, в раздранней и многошвенней ризе ходившаго, вериги тяжкия на раменах носившаго и в месте блатнем уединенно пребывавшаго, вне всякаго человеческого утешения. Обаче ты вся приходившыя со светлым лицом и любовью отеческою принимал еси, богатя и убогия, вельможи и простыя, и коемуждо слово душеполезно изрекал еси, увещавая их благоугождати Богу верою правою и делья благими и звати Ему: Аллилуиа.

Икос 9

Витии премудрыя превозшел еси благодатным действием словес твоих, преподобне

отче Макарие, зане теми грешныя на покаяние приводил еси, кающыяся уцеломудрил еси, подвижающыяся в добродетели укрепил еси, и всем путь спасительный ко Христу показал еси, по немуже сам неуклонно шествовал еси до блаженныя твоея кончины, достоин воистинну явився похвал таковых:

Радуйся, написавый на скрижалех сердца твоего закон Христов.

Радуйся, провозвестник его ближним твоим бывый.

Радуйся, яко быша словеса твоя меда сладчайша жаждавшым учения духовнаго.

Радуйся, яко твоими наставленьми спасошася мнози.

Радуйся, из глубины пустыни светивый миру.

Радуйся, от дебри блатныя возсиявый зарею благоразумия.

Радуйся, Российския страны благодатное озарение.

Радуйся, Новаграда духовное просвещение.

Радуйся, главо святая, благодатию Божиею осененная.

Радуйся, источниче обильный учения
душеспасительного.

Радуйся, проповедниче сладкоглаголивый,
вещавый слова жизни вечныя.

Радуйся, уготовавый ученьми твоими
Господеви подвижники совершенныя.

Радуйся, Макарие, великий пустынножителю.

Кондак 10

Спасения надежду стяжал еси при исходе
твоём, преподобне отче Макарие, и якоже
пшеница зрелая, во время пожатая, кончиною
святою преселился еси от земли во обители
горния, прияти мзду от руки праведнаго
Мздовоздателя Христа, Иже вчини душу твою со
святыми, немолчно возглашающими пред
Престолом Славы Его победную песнь: Аллилуиа.

Икос 10

Царя Небеснаго Христа верный раб и угодник
был еси, преподобне отче Макарие. Темже и
доньне место пустынное твоих подвигов ясно
свидетельствует о твоём богоугождении, яко ты
со Христом во обителях блаженства вечнаго
водворяешься, благоухание чудное испущая от
честнаго твоего гроба. Сего ради вопием ти:

Радуйся, радостно предавай душу твою в
руце Божии.

Радуйся, святую кончину получивый в
возмездие трудов твоих.

Радуйся, благоухание сладостное испустивый
от мертвого твоего телесе.

Радуйся, сие благоухание и доныне испущаяй
верным от честнаго твоего гроба.

Радуйся, мощами твоими в пустыни твоей
погребенный.

Радуйся, душою бессмертною в Сионе Горнем
водворенный.

Радуйся, в недрах земных смиренно
почиваяй.

Радуйся, от раки твоея преславно исцеления
источаяй.

Радуйся, чудесы многими прославленный.

Радуйся, сострадания к людям
преисполненный.

Радуйся, благий целебниче недугов душевных
и телесных.

Радуйся, небесный заступниче с верою к тебе
притекающих.

Радуйся, Макарие, великий пустынножителю.

Кондак 11

Пение Пресвятей Троице горе приносиши, преподобне отче Макарие, и присно ходатайствуеши за люди, молитвенно тя почитающыя, прося им мира свыше и благопоспешения во всем благом. Молися, угодниче Божий, и за нас смиренных и грешных, подвиги твоя хвалебно воспоминающих и имя твое святое в помощь призывающих, да не лишени будем наследия небеснаго и пения со святыми: Аллилуиа.

Икос 11

Светильника тя благодатнаго вемы, преподобне отче Макарие, и прославляем прославльшаго тя Господа, Иже чудесы многими гроб твой ознаменова. Струи бо исцелений благодатных источаеши верным, во еже вопити тебе:

Радуйся, земный ангеле.

Радуйся, небесный человекче.

Радуйся, безмезднаго врачевания источниче.

Радуйся, милости духовныя подателю.

Радуйся, мироположнице благоухания Христова.

Радуйся, услаждай души наша вонею сладкою от святого твоего гроба.

Радуйся, скорбящих утешителю.

Радуйся, болящих целителю.

Радуйся, в сонних и видениях верная посещай.

Радуйся, пустыню твою чудеса прославляяй.

Радуйся, смирением высокая стяжавый.

Радуйся, дерзновение многое ко Господу получивый.

Радуйся, Макарие, великий пустынножителю.

Кондак 12

Благодать от Господа испроси нам, преподобне отче Макарие, почитающым с любовью святую память твою и усердно притекающым к честней раце мощей твоих святых, от неяже чудесная исцеления подаеши недужным. Темже прилежно молимся тебе: исцели наша недуги душевныя и телесныя, и помози нам предстательством твоим спасение

вечное получить, да вкупе с тобою воспоем Дивному во святых Своих Богу: Аллилуиа.

Икос 12

Поюще подвиги твоя пустынные, преподобне отче Макарие, ублажаем равноангельное житие твое, имже поучаеши нас ко славословию Христа Бога, явившаго тя чудотворца преславна. Темже припадающе к раце мощей твоих, умильно глаголем:

Радуйся, Пресвятая Троицы верный угодниче.

Радуйся, Пресвятая Богородицы усердный славителю.

Радуйся, ангельских ликом собеседниче.

Радуйся, всех святых сожителю.

Радуйся, пустынножителей славо и похвало.

Радуйся, Российския Церкви духовная лепото.

Радуйся, пустыни твоя сокровище благодатное.

Радуйся, недугующих врачество Богом дарованное.

Радуйся, приходящих на поклонение мощем твоим святым благий предстателю.

Радуйся, почитающих святую память твою
небесный покровителю.

Радуйся, душ и телес наших целебниче.

Радуйся, преславный и предивный
чудотворче.

Радуйся, Макарие, великий пустынножителю.

Кондак 13

О преподобне и богоносне отче Макарие!
Вонми милостивно гласу моления нашего, и
приими сие малое похвальное пение, с верою и
любовию тебе приносимое от нас недостойных, и
умоли Господа и Владыку нашего, избавити нас
от погибели вечныя и сподобити блаженства
святых, вопиющих Ему вечно хвалебную песнь:
Аллилуиа.

*Этот Кондак читается трижды, затем
Икос 1-й и Кондак 1-й*

Молитва

О священная главо, земный ангеле и
небесный человеке, преподобне и богоносне отче
Макарие! Припадаем ти с верою и любовию и
молимся прилежно: яви нам смиренным и
грешным святое твое заступление. Се бо, грех

ради наших, не имамы свободы чад Божиих просити о потребах наших Господа и Владыку нашего, но тебе молитвенника благоприятнаго к Нему предлагаем, и просим тя со усердием многим: испроси нам у благости Его благопотребныя дары душам и телесем нашим; веру праву, надежду спасения несомненну, любовь ко всем нелицемерну, во искушениях мужество, в злостраданиях терпение, в молитвах постоянство, душ и телес здравие, земли плодоносие, воздуха благорастворение, житейских потреб довольство, мирное и безмятежное житие, благу христьянскую кончину и добрый ответ на Страшнем Суде Христове.

Испроси, угодниче Божий, у Царя царствующих и Господа господствующих: страждущую страну Российскую от лютых безбожников и власти их да свободит, и да возставит престол православных правителей; верных рабов Его, в скорби и печали день и ночь вопиющих к нему, многоболезный вопль да услышит и да изведет от погибели живот наш.

Не забуди, преподобне отче, и пустынное место подвигов твоих, но благоволи о нем и прослави е чудотворении твоими: и всех,

приходящих на поклонение мощем твоим святым, от искушений диавольских и всякаго зла милостивно избави.

Ей, чудотворче святой! Не лиши нас помощи твоя небесная, но молитвами твоими вся ны приведи во пристанище спасения, и наследники яви нас всесветлаго Царствия Христова, да поем и славим неизреченныя щедроты Человеколюбца Бога, Отца и Сына и Святаго Духа, и твое святое отеческое заступление, во веки веков. Аминь.

